

«ТАСДИҚЛАНГАН»

“Kvarts” aksiyadorlik jamiyati
акциядорларининг 2018 йил 14
июндаги умумий йиғилиши
қарори билан
(2018 йил 14 июлдаги 1-сонли
байёнома)



“Kvarts” aksiyadorlik jamiyati
Саноқ комиссияси тўғрисидаги
НИЗОМ
(янги тахрир)

Қувасой шаҳри - 2018 й.

МУНДАРИЖА

I. УМУМИЙ ҚОИДАЛАР

II. ЖАМИЯТ САНОҚ КОМИССИЯСИ АЪЗОЛАРИНИ САЙЛАШ

III. ЖАМИЯТ САНОҚ КОМИССИЯСИНИНГ ИШ ТАРТИБИ

IV. ЖАМИЯТ САНОҚ КОМИССИЯСИНИНГ БАЁННОМАЛАРИ

V. ЖАМИЯТ САНОҚ КОМИССИЯСИ АЪЗОЛАРИНИНГ ЖАВОБГАРЛИГИ

VI. ЯКУНИЙ ҚОИДАЛАР

I. УМУМИЙ ҚОИДАЛАР

1. Ушбу “Kvarts” aksiyadorlik jamiyati Санoқ комиссияси тўғрисида”ги Низом (кейинги ўринларда – Низом) Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонуни (кейинги ўринларда – Қонун), Корпоратив бошқарув Кодекси (Акциядорлик жамиятлари фаолиятининг самарадорлигини ошириш ва корпоратив бошқарув тизимини такомиллаштириш комиссиясининг 31.12.2015йилдаги 9-сонли мажлис баёни билан тасдиқланган) тавсиялари ва “Kvarts” aksiyadorlik jamiyati (кейинги ўринларда - Жамият) Устави асосида ишлаб чиқилган.

2. Ушбу Низом Жамият Санoқ комиссиясининг (кейинги ўринларда – Санoқ комиссияси) мақоми ва вазифаларини, шунингдек унинг аъзоларини сайлаш ва ваколатларини тугатиш тартибини белгилаб беради.

3. Санoқ комиссияси ўз фаолиятида Қонунга, бошқа қонун ҳужжатларига, Жамият Уставига ва ушбу Низомга амал қилади.

4. Санoқ комиссияси Акциядорлар умумий йиғилишининг ишчи органи ҳисобланади.

5. Ушбу Низом Жамиятнинг Санoқ комиссияси аъзоларига тадбиқ этилади.

II. САНОҚ КОМИССИЯСИ АЪЗОЛАРИНИ САЙЛАШ

6. Жамият Кузатув кенгаши томонидан Акциядорларнинг умумий йиғилишида иштирок этиши учун акциядорларни рўйхатга олиш, овозларни санаб чиқиш, шунингдек овоз бериш бюллетенларини тарқатиш учун санoқ комиссияси тузилади.

7. Санoқ комиссияси аъзоларининг сони ва шахсий таркиби Акциядорларнинг умумий йиғилиши томонидан тасдиқланади.

8. Санoқ комиссиясининг сон таркиби 3 (уч) кишини ташкил этади.

9. Санoқ комиссияси таркибига Жамият Кузатув кенгашининг аъзолари, Тафтиш комиссиясининг аъзолари, Жамият ижроия органи раҳбари, шунингдек ана шу лавозимларга номзоди кўрсатилган шахслар кириши мумкин эмас.

10. Жамият Кузатув кенгаши Санoқ комиссиясининг функциясини бажариш учун инвестиция маслаҳатчисини ва қимматли қоғозлар бозорининг бошқа профессионал иштирокчиларини жалб этиш бўйича қарор қабул қилади.

11. Жамият Санoқ комиссиясига амалий кўмак кўрсатиш ёки унинг функциясини бажариш учун мустақил экспертлар(масалан, инвестиция маслаҳатчиси ёки қимматли қоғозлар бозорининг бошқа профессионал иштирокчилари)ни Жамият Кузатув кенгаши билан келишган ҳолда, жалб этиши мумкин.

12. Санoқ комиссияси таркибига қуйидагилар сайланиши мумкин:

акциядорлар;

уларнинг вакиллари;

Жамият ходимлари.

13. Саноқ комиссиясининг аъзолари чекланмаган тарзда қайта сайланиши мумкин.

14. Саноқ комиссиясининг ваколатлари у Акциядорларнинг умумий йиғилиши томонидан сайланган пайтдан эътиборан Умумий йиғилиш томонидан Саноқ комиссиясининг янги таркиби сайланадиган (қайта сайланадиган) пайтга қадар амал қилади.

15. Акциядорларнинг умумий йиғилиши томонидан Саноқ комиссиясининг янги таркиби сайлангандан кейин биринчи мажлисда Саноқ комиссиясининг аъзолари ўз таркибидан кўпчилик овоз билан Саноқ комиссиясининг раисини тегишли баённома расмийлаштирган ҳолда, сайлашади.

16. Саноқ комиссиясининг раиси:

Акциядорларнинг умумий йиғилиши иштирокчиларига рўйхатга олиш натижалари ва кворум борлиги ёки йўқлиги тўғрисида маълум қилади;

кун тартибидаги масалалар бўйича овоз бериш якунларини эълон қилади;

Умумий йиғилишнинг ўтказилиши давомида бошқа масалаларни ҳал этади (бузилган бюллетенларни алмаштириш, акциядорларнинг арзлари ва мулоҳазаларини кўриб чиқиш ва ҳоказо).

III. САНОҚ КОМИССИЯСИНИНГ ИШ ТАРТИБИ

17. Саноқ комиссияси қуйидаги вазифаларни бажаради:

Акциядорларнинг умумий йиғилишида қатнашиш ҳуқуқига эга бўлган акциядорларни қайд этиш рўйхатини тузади;

Акциядорларнинг умумий йиғилишида қатнашиш учун келган шахсларнинг ваколатларини ва шахсини текширади, Акциядорларнинг умумий йиғилишида қатнашиш ҳуқуқига эга бўлган акциядорларни қайд этиш рўйхатида акциядорлар ва уларнинг вакилларини рўйхатдан ўтказиш, ишончномалар ва улар томонидан бериладиган ҳуқуқлар ҳисобини юритади;

Акциядорларга ва уларнинг вакилларига овоз бериш бюллетенларини, шунингдек Акциядорлар умумий йиғилишини ўтказишга тайёргарлик кўришда тақдим этиладиган бошқа ахборот(материаллар)ни беради;

рўйхатдан ўтказиш якунларини чиқаради ва Акциядорларнинг умумий йиғилишида кворум бор ёки йўқлигини аниқлайди, тегишли баённома расмийлаштиради ва Акциядорларнинг умумий йиғилиши иштирокчиларини рўйхатдан ўтказиш якунларини эълон қилади;

овозга қўйиладиган масалалар бўйича овоз бериш тартибини, шу жумладан Жамият Кузатув кенгаши аъзоларини сайлаш бўйича кумулятив овоз бериш тартибини, умумий улушли мулкда бўлган акциялар бўйича овоз бериш тартибини, Жамиятнинг аффилиланган шахслар билан битишувлари бўйича овоз бериш тартибини тушунтиради;

овоз беришнинг белгиланган тартиби ва акциядорларнинг овоз беришда иштирок этиш ҳуқуқларини таъминлайди, Умумий йиғилишда овоз бериш ҳуқуқларининг акциядорлар (уларнинг вакиллари) томонидан амалга оширилиши муносабати билан юзага келадиган масалаларни тушунтиради;

овозларни санаб чиқади ва овоз бериш якунларини чиқаради, овоз бериш якунлари тўғрисида баённома тузади;

Умумий йиғилишда Акциядорларнинг умумий йиғилиши кун тартибидаги масалалар бўйича овоз бериш якунларини эълон қилади;

овоз бериш бюллетенларини муҳрлайди ва Жамиятнинг архивига топширади.

қонун ҳужжатларида ва Жамият Уставида назарда тутилган бошқа вазифаларни амалга оширади.

а) Акциядорларнинг умумий йиғилишида қатнашиш ҳуқуқига эга бўлган акциядорларни қайд этиш рўйхатини тузиш

18. Акциядорларнинг умумий йиғилишида иштирок этиш ҳуқуқига Акциядорларнинг умумий йиғилиши ўтказиладиган санадан 3 (уч) иш куни олдин шакллантирилган Жамият акциядорларининг реестрида қайд этилган акциядорлар эга бўлади.

19. Жамият акциядорнинг талабига кўра акциядорга у Акциядорларнинг умумий йиғилишини ўтказиш учун шакллантирилган Жамият акциядорларининг реестрига киритилганлиги тўғрисидаги ахборотни тақдим этиши шарт.

20. Акциядорларнинг умумий йиғилишида иштирок этиш ҳуқуқига эга бўлган шахсларни қайд этиш рўйхати Акциядорларнинг умумий йиғилиши ўтказиладиган санадан 3 (уч) иш куни олдин шакллантирилган Жамият акциядорларининг реестри маълумотлари асосида тузилади.

Қайд этиш рўйхати Ижроия органи раҳбари томонидан имзоланади ва Жамият муҳри билан тасдиқланади.

Агар қайд этиш рўйхати 2 (икки) ва ундан кўп варақдан ташкил топган бўлса, у тартиб рақами қўйилган, ип ўтказиб тикилган ва Ижроия органи раҳбари томонидан имзоланган ва Жамият муҳри билан тасдиқланган бўлиши керак.

Қайд этиш рўйхатида тузатишлар ҳамда ўчириб ёзишларга йўл қўйилмайди.

б) Акциядорларнинг умумий йиғилиши иштирокчиларини рўйхатдан ўтказиш тартиб-таомили

21. Акциядорларнинг умумий йиғилишида иштирок этиш ҳуқуқи акциядор томонидан шахсан ёки унинг вакили орқали амалга оширилади.

Давлат вакилининг Акциядорларнинг умумий йиғилишида иштирок этиш ҳуқуқи шахсан унинг ўзи томонидан амалга оширилади.

Акциядор Акциядорларнинг умумий йиғилишидаги ўз вакилини исталган вақтда алмаштиришга ёки йиғилишда шахсан ўзи иштирок этишга ҳақлидир.

22. Акциядорнинг вакили Акциядорларнинг умумий йиғилишида ёзма шаклда тузилган ишончнома асосида иш юритади. Овоз беришга доир ишончномада ваколат берган ва вакил қилинган шахс тўғрисидаги маълумотлар (исми-шарифи ёки номи, яшаш жойи ёки жойлашган ери, паспортига оид маълумотлар) бўлиши лозим.

Жисмоний шахс номидан берилган овоз беришга доир ишончнома нотариал тартибда тасдиқланган бўлиши керак.

Юридик шахс номидан овоз беришга доир ишончнома унинг раҳбарининг имзоси ва ушбу юридик шахснинг муҳри билан тасдиқланган ҳолда фирма бланкида берилади.

23. Агар Жамиятнинг акцияси бир нечта шахснинг умумий улушли мулкида бўлса, Акциядорларнинг умумий йиғилишида овоз бериш ваколатлари уларнинг хоҳишига кўра умумий улушли мулк иштирокчиларидан бири ёки уларнинг умумий вакили томонидан амалга оширилади. Кўрсатиб ўтилган ҳар бир шахснинг ваколатлари тегишли тарзда расмийлаштирилган бўлиши керак.

24. Акциядорларнинг умумий йиғилиши иштирокчиларини рўйхатдан ўтказиш қуйидаги тартибда амалга оширилади:

рўйхатдан ўтказиш Акциядорларнинг умумий йиғилишини чақириш тўғрисидаги эълонда кўрсатилган вақтдан кечиктирмасдан бошланади;

рўйхатдан ўтказиш Акциядорларнинг умумий йиғилишини чақириш тўғрисидаги эълонда кўрсатилган вақтдан кечиктирмасдан якунланади;

рўйхатдан ўтказиш Акциядорларнинг умумий йиғилишида иштирок этиш ҳуқуқига эга бўлган шахсларни қайд этиш рўйхати асосида амалга оширилади;

Акциядорларнинг умумий йиғилишига келган шахс паспорт ёки шахсни тасдиқловчи бошқа ҳужжатни тақдим этади;

акциядор-юридик шахснинг ваколатли шахси ҳам унинг ваколатларини тасдиқлайдиган ва тегишли тарзда расмийлаштирилган ишончнома тақдим этади. Юридик шахснинг раҳбари (биринчи шахс) Акциядорларнинг умумий йиғилишида ишончномасиз иштирок этади;

акциядор-жисмоний шахснинг вакили ҳам унинг ваколатларини тасдиқлайдиган ва тегишли тарзда расмийлаштирилган ишончномани қўшимча равишда тақдим этади;

инвестиция активларини ишончли бошқарувчининг ваколатли шахси қўшимча равишда ишончли бошқарувчининг раҳбари имзоси ва унинг муҳри билан тасдиқланган ҳолда фирма бланкида ишончнома тақдим этади. Ишончнома акциядор ва ишончли бошқарувчи ўртасидаги ишончли бошқарув шартномасига ҳаволани ўз ичига киритиши лозим;

Санок комиссиясининг аъзолари Акциядорларнинг умумий йиғилишида қатнашиш учун келган шахсларнинг шахсини улар тақдим этган ҳужжат асосида текширишади;

Санок комиссиясининг аъзолари Акциядорларнинг умумий йиғилишида қатнашиш учун келган шахсларнинг ваколатларини қайд этиш рўйхати ва тақдим этилган ишончномалар асосида текширишади;

Санок комиссиясининг аъзолари акциядорлар-юридик шахсларнинг ваколатли шахслари ва акциядорлар-жисмоний шахсларнинг ишончли шахслари бўйича ишончномалардаги маълумотларни (рақам, сана, овозлар сони ва ҳоказо) қайд этиш рўйхатига киритишади;

акциядорлар ва уларнинг вакиллари қайд этиш рўйхатига имзо қўйишади.

25. Саноқ комиссиясининг аъзолари тақдим этилган ишончномаларнинг рўйхатини тузишади ва ишончномаларни рўйхат билан бирга алоҳида папкага жойлаштиришади.

в) Акциядорларга ва уларнинг вакилларига овоз бериш бюллетенлари ва Акциядорларнинг умумий йиғилишига тайёргарлик кўришда тақдим этиладиган ахборотларни (материалларни) бериш

26. Саноқ комиссияси рўйхатдан ўтган акциядорларга ёки уларнинг вакилларига кун тартибидаги масалалар бўйича овоз бериш бюллетенларини беради.

27. Овоз бериш бюллетенининг шакли ва матни Жамиятнинг Кузатув кенгаши томонидан тасдиқланади, Акциядорларнинг навбатдан ташқари умумий йиғилиши Жамият Кузатув кенгаши томонидан қақирилмаган ҳоллар бундан мустасно.

28. Овоз бериш бюллетенида: Жамиятнинг тўлиқ фирма номи, Акциядорлар умумий йиғилишини ўтказиш санаси, вақти ва жойи, овоз беришга қўйилган ҳар бир масаланинг таърифи ва уни кўриб чиқиш навбати, овоз беришга қўйилган ҳар бир масала бўйича "ёқлайман", "қаршиман" ёки "бетарафман" деган мазмундаги сўзлар билан ифодаланган овоз бериш вариантлари кўрсатилган бўлиши (бундан овоз беришга қўйилган масалага "ёқлайман" деган мазмундаги сўз билан ифодаланадиган кумулятив овоз бериш мустасно), овоз бериш бюллетени акциядор (унинг вакили) томонидан имзоланиши лозимлиги тўғрисидаги кўрсатма бўлиши керак.

Кузатув кенгашининг аъзоларини сайлаш бўйича овоз бериш учун алоҳида бюллетенлар берилади.

Жамиятнинг Кузатув кенгаши ёки Тафтиш комиссияси аъзосини сайлаш тўғрисидаги масала юзасидан овоз бериш ўтказилган тақдирда, овоз бериш бюллетенида номзод тўғрисидаги маълумотлар, унинг фамилияси, исми, отасининг исми кўрсатилиши лозим.

29. Акциядорлар ва уларнинг вакиллари бюллетенларни олганликлари тўғрисида бюллетенларни бериш журнаliga имзо қўйишади.

30. Саноқ комиссияси, шунингдек акциядорларга ва уларнинг вакилларига Акциядорлар умумий йиғилишининг иштирокчиларига тарқатиладиган ахборот(материаллар)ни тақдим этади.

г) Акциядорларнинг умумий йиғилиши кворумини аниқлаш

31. Саноқ комиссияси рўйхатдан ўтказиш якунлангандан кейин рўйхатдан ўтказилган акциядорлар ёки уларнинг вакиллари эгалик қиладиган овозларни санаб чиқади ва Умумий йиғилишнинг кворуми борлигини аниқлайди.

32. Агар Акциядорларнинг умумий йиғилишида иштирок этиш учун рўйхатдан ўтказиш тугалланган пайтда Жамиятнинг жойлаштирилган овоз берувчи акцияларининг жами 50 (эллик) фоизидан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, Акциядорларнинг умумий йиғилиши ваколатли (кворумга эга) бўлади.

Белгиланган муддатларда бирламчи жойлаштирилмаган акциялар, шунингдек Жамиятнинг иккиламчи бозорда сотиб олиш ёки қайтариб сотиб олиш натижасида келиб тушган фармойишлари кворумни аниқлашда ҳисобга олинмайди.

Умумий йиғилишнинг кун тартибида Жамиятнинг имтиёзли акциялари овоз бериш ҳуқуқига эга бўлган масалалар бўлган тақдирда, Умумий йиғилиш кворуми фақат Жамиятнинг жойлаштирилган оддий акцияларини ҳисобга олган ҳолда, аниқланади.

33. Санок комиссияси рўйхатдан ўтказилган акциядорлар ва уларнинг вакилларининг овозлари санаб чиқилгандан ва кворум аниқлангандан кейин рўйхатдан ўтказиш якунлари ва Акциядорларнинг умумий йиғилиши кворуми борлиги ёки йўқлиги тўғрисида баённома тузади.

Санок комиссиясининг раиси рўйхатдан ўтказиш якунларини ва Акциядорларнинг умумий йиғилишини ўтказиш учун кворум борлиги ёки йўқлигини эълон қилади.

34. Акциядорларнинг умумий йиғилишини ўтказиш учун кворум бўлмаса, Акциядорларнинг такрорий умумий йиғилишини ўтказиш санаси эълон қилинади. Акциядорларнинг такрорий умумий йиғилишини ўтказишда кун тартибини ўзгартиришга йўл қўйилмайди.

Агар акциядорларнинг ўтказилмай қолган йиғилиши ўрнига чақирилган такрорий умумий йиғилишида иштирок этиш учун рўйхатдан ўтказиш тугалланган пайтда Жамиятнинг жойлаштирилган овоз берувчи акцияларининг жами 40 (қирқ) фоиздан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, Акциядорларнинг такрорий умумий йиғилиши ваколатли бўлади.

Акциядорларнинг такрорий умумий йиғилишини ўтказиш тўғрисида хабар қилиш Қонуннинг 62-моддасида назарда тутилган муддатларда ва шаклда амалга оширилади.

Кворум бўлмаганлиги сабабли Акциядорларнинг умумий йиғилишини ўтказиш санаси 20 (йигирма) кундан кам муддатга қўчирилган тақдирда, Умумий йиғилишда иштирок этиш ҳуқуқига эга бўлган акциядорлар ўтказилмай қолган Умумий йиғилишда иштирок этиш ҳуқуқига эга бўлган акциядорларнинг реестрига мувофиқ аниқланади.

д) Санок комиссияси томонидан овоз бериш тартибини тушунтириш

35. Санок комиссияси номидан унинг раиси ёки аъзоси овоз беришдан олдин Акциядорларнинг умумий йиғилиши иштирокчиларига овоз бериш тартиби ва овоз бериш бюллетенларини тўлдириш қоидалари тўғрисида ахборот беради.

36. Акциядорларнинг умумий йиғилишида овозга қўйилган масалалар бўйича куйидагилар овоз бериш ҳуқуқига эга бўлади:

Жамиятнинг оддий акциялари эгалари бўлган акциядорлар;

Қонунда ва Жамият Уставида назарда тутилган ҳолларда Жамиятнинг имтиёзли акциялари эгалари бўлган акциядорлар.

37. Акциядорларнинг умумий йиғилишида кун тартиби масалалари бўйича овоз бериш овоз бериш бюллетенлари орқали амалга оширилади.

Кун тартибидаги ҳар бир масала муҳокамасидан кейин овоз бериш ўтказилади.

38. Акциядорларнинг умумий йиғилишида овоз бериш "Жамиятнинг овоз берувчи битта акцияси - битта овоз" принципи бўйича амалга оширилади, Жамиятнинг Кузатув кенгаши аъзоларини сайлаш бўйича кумулятив овоз беришни ўтказиш ҳоллари бундан мустасно.

39. Жамиятнинг Кузатув кенгаши аъзolari сайлови кумулятив овоз бериш орқали амалга оширилади.

Кумулятив овоз беришда ҳар бир акциядорга тегишли овозлар сони Жамиятнинг Кузатув кенгашига сайланиши лозим бўлган шахслар сонига кўпайтирилади ва акциядор шу тариқа олинган овозларни битта номзодга тўлиқ беришга ёки икки ва ундан ортиқ номзодлар ўртасида тақсимлашга ҳақли.

Энг кўп овоз тўплаган номзодлар Жамият Кузатув кенгашининг таркибига сайланган деб ҳисобланади.

Давлат вакили лавозимига кўра Жамият Кузатув кенгашининг аъзоси бўлади, у Акциядорларнинг умумий йиғилиши томонидан сайланмайди (қайта сайланмайди).

е) Овоз бериш якунларини чиқариш

40. Кун тартибининг барча масалалари кўриб чиқилгандан кейин Санок комиссияси аъзolari акциядорлардан ёки уларнинг вакилларида бюллетенларни йиғишади ва овозларни санаб чиқишади.

41. Овоз берилганида овоз берувчи қайси масала бўйича эҳтимол тутилган овоз бериш вариантларидан фақат биттасини қолдирган бўлса, ўша масала бўйича берилган овозлар ҳисобга олинади. Мазкур талабни бузган ҳолда тўлдирилган овоз бериш бюллетенлари ҳақиқий эмас деб топилади ва улардаги масалалар бўйича берилган овозлар ҳисобга олинмайди.

Агар овоз бериш бюллетенида овозга қўйилган бир нечта масала кўрсатилган бўлса, бир ёки бир нечта масалага нисбатан ушбу қисмда кўрсатилган талабга риоя этилмаганлиги бюллетеннинг умуман ҳақиқий эмас деб топилишига сабаб бўлмайди.

42. Санок комиссияси овоз бериш якунларини чиқаришда қуйидагиларга амал қилади:

Акциядорларнинг умумий йиғилишини олиб бориш тартиби бўйича (йиғилиш регламенти бўйича), йиғилишнинг ишчи органларини – Раёсатни, йиғилиш раисини ва котибини, Санок комиссиясини сайлаш бўйича ва кун тартибини тасдиқлаш бўйича қарорлар Акциядорларнинг умумий йиғилишида иштирок этаётган акциядорларнинг оддий кўпчилилик овози билан қабул қилинади. Овоз бериш қўл кўтариш (бюллетенларсиз) билан амалга оширилади.

Акциядорларнинг умумий йиғилиши йиғилиш кун тартибига киритилмаган масалалар бўйича қарор қабул қилишга, шунингдек кун тартибига ўзгартиришлар киритишга ҳақли эмас.

Кун тартибидаги масалалар бўйича овозларни санаш Жамиятнинг оддий акциялари эгалари бўлган Жамият акциядорлари эгалик қиладиган овозлар сонини умумлаштириш йўли билан амалга оширилади.

Кун тартибида Жамиятнинг имтиёзли акциялари эгалари овоз бериш ҳуқуқига эга бўладиган масалалар бўлса, овозларни санаш имтиёзли акциялар сонини ҳисобга олган ҳолда амалга оширилади.

Акциядорларнинг умумий йиғилишида овозга қўйилган, ҳал қилиш чоғида Жамиятнинг оддий ва имтиёзли акциялари эгалари бўлган акциядорлар овоз бериш ҳуқуқига эга бўладиган масала юзасидан овозларни санаб чиқиш овоз берувчи акцияларнинг барчаси бўйича биргаликда амалга оширилади.

Акциядор Акциядорларнинг умумий йиғилишида масофадан туриб қатнашган тақдирда, электрон рақамли имзо билан тасдиқланган электрон бюллетенлар Жамият электрон почтасининг расмий манзилига Акциядорларнинг умумий йиғилиши тугагунга қадар юборилиши зарур.

Акциядорларнинг умумий йиғилишида шахсан иштирок этиш имкони бўлмасдан, масофадан туриб қатнашган акциядорнинг овоз бериши электрон бюллетенни тўлдириш, уни электрон рақамли имзо билан тасдиқлаш ва электрон почта орқали Санок комиссияси овоз бериш якунларини чиқаргунга қадар юбориш йўли билан амалга оширилади.

43. Овозга қўйилган масала бўйича Акциядорлар умумий йиғилишининг қарори Жамиятнинг овоз берувчи акциялари эгалари бўлган, йиғилишда иштирок этаётган акциядорларнинг кўпчилик (оддий кўпчилик) овози билан қабул қилинади.

Солиққа оид ёки давлат олдидаги бошқа қарздорлик ҳисобига Жамият устав фондидаги давлат улушини шакллантириш ёки ошириш тўғрисидаги қарор Акциядорлар умумий йиғилиши томонидан Жамиятнинг жойлаштирилган овоз берувчи акцияларининг камида учдан икки қисми эгалари бўлган акциядорларнинг (давлатдан ташқари) розилиги мавжуд бўлган тақдирда, акциядорларнинг оддий кўпчилик овози билан қабул қилинади.

Қонуннинг 59-моддаси биринчи қисмининг иккинчи - тўртинчи, олтинчи ва ўн тўртинчи хатбошиларида, 84-моддасининг иккинчи ва учинчи қисмларида кўрсатилган масалалар бўйича қарор Акциядорлар умумий йиғилиши томонидан Акциядорларнинг умумий йиғилишида иштирок этаётган овоз берувчи акцияларнинг эгалари бўлган акциядорларнинг тўртдан уч қисмидан иборат кўпчилик (малакали кўпчилик) овози билан қабул қилинади.

Акциядорларнинг умумий йиғилиши томонидан давлат вакилининг иштирокисиз қабул қилинган қарорлар, шунингдек қонун ҳужжатларида белгиланган тартибда вето қўйилган қарорлар ижро этилмайди.

44. Овоз бериш якунлари бўйича Санок комиссияси овоз бериш якунлари тўғрисида баённома тузади, баённома жумладан Акциядорлар умумий йиғилишининг кворуми мавжудлиги тўғрисидаги маълумотларни ҳам ўз ичига олади.

45. Жамият Корпоратив бошқарув кодекси тавсияларига мувофиқ Акциядорларнинг умумий йиғилишида иштирок этувчи шахсга шундай шахс

хисобидан ўзи тўлдирган бюллетень нусхасини олиш имконини беради. Бюллетень нусхаси Санок комиссиясининг раиси томонидан тасдиқланади.

ж) Овоз бериш якунларини акциядорлар ва уларнинг вакиллари эътиборига етказиш

46. Акциядорларнинг умумий йиғилиши томонидан қабул қилинган қарорлар, шунингдек овоз бериш якунлари қонун ҳужжатларида назарда тутилган тартиб ва муддатларда акциядорлар эътиборига етказилади.

47. Овоз бериш якунлари Акциядорларнинг овоз бериш ўтказилган умумий йиғилишида ўқиб эшиттирилади, шунингдек Акциядорларнинг умумий йиғилиши ёпилганидан кейин овоз бериш якунлари тўғрисидаги ҳисоботни эълон қилиш орқали акциядорлар эътиборига етказилади.

з) Жамият архивига бюллетенларни топшириш

48. Овоз бериш якунлари тўғрисида баённома тузилганидан, Санок комиссиясининг аъзолари томонидан имзоланганидан ва Акциядорлар умумий йиғилишининг баённомаси имзоланганидан кейин Санок комиссияси бюллетенларни ва Санок комиссиясининг овоз бериш якунлари тўғрисидаги баённомасининг бир нусхасини хатжилдга жойлаштиради, хатжилдни муҳрлайди ва унда Акциядорларнинг умумий йиғилишини ўтказиш санаси, вақти ва жойини, йиғилиш турини (йиллик ёки навбатдан ташқари), бюллетенлар сонини ўз ичига олган ёзув қайд этади. Муҳрланган бюллетенлар икки нусхада тегишли қабул қилиш-топшириш далолатномасини расмийлаштирган ҳолда, сақлаб қўйиш учун Жамиятнинг архивига топширилади.

Қабул қилиш-топшириш далолатномасининг бир нусхаси Санок комиссиясининг ҳужжатларига қўшиб қўйилади.

Санок комиссиясининг овоз бериш якунлари тўғрисидаги баённомасининг иккинчи нусхаси Акциядорлар умумий йиғилишининг баённомасига қўшиб қўйилиши лозим.

IV. САНОҚ КОМИССИЯСИНИНГ БАЁННОМАЛАРИ

49. Акциядорларнинг олдинги умумий йиғилиши томонидан сайланган Санок комиссияси Акциядорларнинг умумий йиғилишида иштирок этиш ҳуқуқига эга шахсларни рўйхатдан ўтказиш натижалари бўйича Акциядорларнинг умумий йиғилишида иштирок этиш ҳуқуқига эга шахсларни рўйхатдан ўтказиш ва Акциядорларнинг умумий йиғилиши қворуми мавжудлиги тўғрисида баённома тузади.

50. Акциядорларнинг умумий йиғилиши томонидан Санок комиссиясининг янги таркиби сайлангандан кейин биринчи мажлисда Санок комиссиясининг аъзолари ўз таркибидан Санок комиссиясининг раисини сайлашади.

Санок комиссиясининг раисини сайлаш тегишли баённома расмийлаштирган ҳолда, амалга оширилади.

51. Санок комиссияси кун тартибидаги барча масалалар бўйича овозлар санаб чиқилгандан сўнг овоз бериш якунлари тўғрисида баённома тузади.

52. Саноқ комиссияси зарур бўлганда, бошқа баённомалар тузиши мумкин.

53. Саноқ комиссиясининг баённомалари Саноқ комиссиясининг ҳозир бўлган барча аъзолари томонидан имзоланади ва 2 (икки) нусхада расмийлаштирилади.

54. Саноқ комиссиясининг баённомалари жамиятнинг жойлашган ўрнидаги Саноқ комиссиясининг ҳужжатлари билан бирга сақланади.

Овоз бериш якунлари тўғрисида баённоманинг бир нусхаси бюллетенлар билан бирга муҳрланади ва Жамият архивига сақлаш учун топширилади.

Овоз бериш якунлари тўғрисидаги баённоманинг иккинчи нусхаси Акциядорлар умумий йиғилишининг баённомасига қўшиб қўйилиши лозим.

55. Саноқ комиссиясининг баённомаларига Саноқ комиссиясига келиб тушган ёзма шикоят ва аризалар илова қилинади.

V. САНОҚ КОМИССИЯСИ АЪЗОЛАРИНИНГ ЖАВОБГАРЛИГИ

56. Саноқ комиссияси аъзолари:

Акциядорларнинг умумий йиғилишида иштирок этиш ҳуқуқига эга шахсларни рўйхатдан ўтказиш тартибини бузганлик учун;

Жамият акциядорларининг реестридаги ва овоз бериш бюллетенлари билан ишлашда олинган махфий ахборотни ошкор қилганлик учун;

овозларни санашдаги маълумотларнинг нотўғри бўлмаслиги учун жавобгар бўладилар.

VI. ЯКУНИЙ ҚОИДАЛАР

57. Ушбу Низом Жамият акциядорларининг умумий йиғилиши томонидан тасдиқланган пайтдан бошлаб кучга киради.

58. Ушбу Низомга амалдаги қонун ҳужжатлари ўзгартирилганлиги ва Жамият Уставига ўзгартириш ва (ёки) қўшимчалар киритилганлиги муносабати билан ўзгартириш ва (ёки) қўшимчалар киритилиши мумкин.

59. Ушбу Низомга киритилган ўзгартириш ва (ёки) қўшимчалар Акциядорлар умумий йиғилиши томонидан тасдиқланган пайтдан бошлаб кучга киради.

“Kvarts” AJ Бошқарув раиси



А.А.Пулатов